

10/03/1999

Hak rakyat Sabah terjamin

dik Enchi; Hasimah Muslim

KOTA BELUD, Selasa - Bekas Ketua Menteri Datuk Mohd Salleh Said menegaskan Kerajaan Barisan Nasional (BN) tidak pernah mengabaikan hak rakyat Sabah seperti termaktub dalam Perjanjian 20 Perkara dan Perlembagaan Malaysia.

Malah, menurutnya, Kerajaan Persekutuan menyalurkan bantuan dan sumbangan melebihi daripada hak rakyat Sabah yang termaktub dalam perjanjian yang dicapai berhubung kemasukan Sabah dalam pembentukan Malaysia pada 1963.

"Justeru, dakwaan pembangkang kononnya Kerajaan Persekutuan menafikan hak rakyat Sabah tidak timbul sama sekali.

"Pembangkang sebaliknya, menggunakan isu sensitif itu bagi mengelirukan pengundi supaya memihak kepada mereka," katanya hari ini.

Justeru, Mohd Salleh yang mempertahankan kerusi Dewan Undangan Negeri (DUN) Usukan pada pilihan raya Jumaat dan Sabtu ini meminta rakyat Sabah supaya tidak terpengaruh dengan dakwaan pembangkang.

Beliau yang juga Ketua Menteri pertama mewakili Bumiputera Islam mengikut sistem penggiliran jawatan Ketua Menteri sejurus pilihan raya 1994, berkata, bagi melihat keprihatinan kerajaan BN, rakyat perlu melihat keseluruhan pembangunan dan kemajuan yang di nikmati negeri ini.

Dalam kempen sejak hari penamaan calon Selasa lalu, pembangkang sering membangkitkan isu hak rakyat Sabah berdasar Perlembagaan Persekutuan dan Perjanjian 20 Perkara.

Parti pembangkang mendakwa kononnya hak rakyat Sabah yang sepatutnya dilindungi mengikut perlembagaan dan perjanjian itu telah dinafikan.

Pengarah Eksekutif Institut Kajian Pembangunan Sabah (IDS), Dr Mohd Yaakub Johari pula berkata, rakyat Sabah tidak perlu bimbang kerana hak mereka sebagai rakyat Malaysia adalah terjamin.

Menurutnya, kenyataan Perdana Menteri Datuk Seri Dr Mahathir Mohamad berhubung keengganan Kerajaan Pusat bekerjasama dengan pembangkang jika berjaya membentuk kerajaan perlu dilihat secara rasional.

"Ia tidak menyentuh perkara yang termaktub dalam perlembagaan atau perjanjian dan tidak sepatutnya dianggap sebagai percubaan mengugut rakyat Sabah," katanya.

Beliau berkata, Perdana Menteri juga perlu membuat pengakuan terbuka bagi memastikan pengundi memilih parti komponen BN yang pemimpinnya memenangi pilihan raya menerusi PBS pada pilihan raya 1994.

(END)